

Eilpheilsu

Gevq-a nail gaq

Haoqgavq niil keiv iqmoeq ilmoeq bhai gaqkhoel Paolluv aivq-i mail geqv-a nail ngaol dai, geqv-ai thaq nail ngaol. Al ovqtavq, milnee uqnee khe Khali yaq juq jemaol iqsanl, Paolluv-i mail geqv-a nail ngaol dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 61 kovq niidai bhai geqv-a nail ngaol. Paolluv Lolmav meenq nail thaonq bhai iqmoeq ilmoeq aol-u phao, geqv-a nail ngaol. Paolluv a bhai aol-u phao, haoqgavq liq keiv geqv-a nail ngaol. Haoqgavq al liq keiv bhai neq, "Thaonq bhai aol khi geqv-a nail haoqgavq" dai, khul nail ngaol. Khul nail haoqgavq dai ge haq neq, Eilpheilsu, Pillilpiv, Gaollaolsail khi mail Philleilmoq nail haoqgavq ngaol.

Khaq sil gaq bhai geqv bhiq-a nail

Haoqgavq niil keiv neq, Eilpheilsu meenq khe jaol nail Khali yaq munl bhai geqv bhiq-a nail ngaol. Eilpheilsu meenq neq, meenq meenq ma teevq meenq pevq khi laovq laovq ma juq nee yalkav gaoq nail jaiqgaiq jaiq kha kha nail meenq teevq meenq pevq nail ngaol. Eilpheilsu meenq khe Khali yaq juq neq, Yuldav tsaol-aq juq nee maqtsil yu nail jeq-e jaq-a juq mao jaiq nail ngaol.

Khul bhai noeqthunq khi gevq-a nail

Haoqgavq niil keiv neq, Paolluv Miqyail-i mail bivq lavq-a nail geeqlaoq eeljaol nail ganl bhai maqkhaiq, hevqkovq nail ganl bhai maqkhaiq, aqdoevq khalhai yaq doevq nail ganl bhai maqkhaiq, aqmeeq-ai bhi heeq nia nail haqbhoil gevq-a nail ngaol.

Iqmoeq ilmoeq khe daoq

¹ Ngäl neq, Miqyail neema tsaq nail ngel-i mail, Yeiqsul Khali nail gaqkhoel ya jiovq-a nail Paolluv ngaol. Eilpheilsu meenq bhai jaol nail Khali yaq juq bhai, haoqgavq niil gevq bhoel-ai leevq-a nail ngaol. Nuljuq neq, Yeiqsul Khali bhai neema thaqtsaol nail meeq nail haol nail juq ngaol.

² Ngadao nail Aqbhu Miqyail khi mail Heeqphaq Yeiqsul Khali nail geeqlaoq eeljaol khi mail neesal-ovq nail phaqa, nuljuq nail kovtavq bhai jiav dei-eiq.

Yeiqsul Khali nail lavqkhoel ya-a nail aqhaqlal phao khe geeqlaoq

³ Ngadao nail Heeqphaq Yeiqsul Khali nail Aqbhu Miqyail bhai tsiqeeq bhel. Aivq neq, Khali bhai juq khi, aqhaqlal phao tavq nail nqtavq khe geeqlaoq yaoq phaqa yaoq-ao nee, ngadao juq bhai bivq lavq-a nail ngaol. ⁴ Miltsaq maq teivq-u nee, Miqyail ngadao juq bhai gaiq-a nail ngel-i mail, Khali bhai juq khi ngadao bhai tsel dov lavq-a nail ngaol. Ngadao aivq nail sivtavq bhai tsaolmeeq tsaolhaol khi mail oeqbal thaqa nail phaqa maq jiav nail tsaol-aq pevq

lal dai, Miqyail ngadao juq bhai tsel dov lavq-a nail ngaol. ⁵ Miqyail Yeiqsul Khali bhaqda nee ngadao bhai iqmoeq-u nee mail aivq nail yaq bhi pevq lal nail haqbhoil noeqceiv-ai thaq nail ngaol. Alhai pevq lal dai, aivq neema tsaq nail ngaol. ⁶ Ngadao Miqyail nail geeqlaoq eeljaol nee tavq nail seiqleiq khaoqsail bhai tsiqeeq bhel. Khul khi mail dai ngal neq, Miqyail aivq mailma-ail gaiq-a nail aivq nail Yaqyov ngadao nail haqbhoil bivq lavq-a nail ngaol.

⁷ Yaqyov nail aqsivq bhaqda nee, Miqyail ngadao bhai hevqkovq lavq khi oeqbal phaiq lavq-a nail ngaol. Aivq nail geeqlaoq eeljaol eeq dee heel deede nail ngel-i mail, alhai nl-a nail ngaol. ⁸ Neenoeq neekha khi mail noeqhee neeq dov nail lavqkhoel, Miqyail nail geeqlaoq eeljaol al, ngadao nail kovtavq bhai teevq pov nee teevq pov mao lal dai, aivq nl lavq thailthaiq nail ngaol. ⁹ Khul khi mail dai ngal-aq neq, aq-u Miqyail aivq nail neenoeq oil-uvq-ai thaq khi ngaol-aoq, niil aq-il ngadao juq bhai phaodaiq lavq-a nail ngaol. Khali bhaqda nee aivq alhai nl nail, neema tsaq nail ngaol. ¹⁰ Phaodaiq lavq-a nail al neq, yanq kev lal-u phao, nqtavq kovtavq bhai khal jaol khal jiaq nail yaoq pha q yaoq-ao nee maqkhaiq, miltsaq kovtavq bhai khal jaol khal jiaq nail yaoq pha q yaoq-ao nee maqkhaiq, Khali bhai bhi tsaq bhi jil lai nail ngaol.

¹¹ Ngadao iqsanl Khali bhaqda nee, aivq nail tsaol-aq pevq lal dai, iqmoeq-u nee mail Miqyail ngadao bhai tselpav-ai thaq nail ngaol. Miqyail neq, yaoq pha q yaoq-ao nee nail lavqkhoel aivq neema tsaq khi bhi bhee lal dai, noeqceiv-ai thaq

nail ngaol. ¹² Aivq nail seiqlaiq khaoqsail bhai bhi tsiqeeq nail dai khi, Khali bhai iqmoeq-u nee mail, noeqthunq-a nail ngadao bhai, Miqyail tselpav-ai thaq nail ngaol.

¹³ Nuljuq iqsanl, nuljuq jaol nail bhai hevqkovq nail pha q bhi kev lee-a nail, lavqkhiq tsail nail geeqlaoq daoq pevq nail, maldil tsaq nail daoq ya gaiq khi, Miqyail nail tsaol-aq pevq lal-a nail ngaol. Nuljuq Khali bhai neema thaqtsaol nail ngel-i mail, Miqyail-i mail saljial jaq-ai thaq nail khe-ai, Meeqnail Haolnail Aqhaqlal bhai juq khi, aivq nail tsaol-aq bhi pevq ceiv nail haqbhoil, nuljuq bhai junq deeq-ai thaq nail ngaol. ¹⁴ Aqhaqlal Miqyail neq, ngadao Miqyail nail jaiqbhoil teevq bhee ya naol dai, ya heeq kivq nail haqbhoil bivq lavq-a nail ngaol. Ngadao aivq nail seiqlaiq khaoqsail bhai tsiqeeq nia dai, Miqyail alhai nl lavq-a nail ngaol.

Paolluv geeqlaoq hal-a nail ganl

¹⁵ Nuljuq Heeqphaq Yeiqsul bhai neema thaqtsaol nail ganl maqkhaiq, Khali yaq iqsanl bhai gaiq-a nail ganl maqkhaiq, ngal ya gaiq-a nail ngaol. ¹⁶ Alheel ngel-i mail, ngal Miqyail bhai khaq mao iqsanl, geeqlaoq hal-u phao, nuljuq nail haqbhoil iqsanl, tsiqeeq tsiqeeq-ail Miqyail bhai geeqlaoq hal nail ngaol. ¹⁷ Ngal geeqlaoq hal-u phao, ngadao nail Heeqphaq Yeiqsul Khali nail Miqyail bhai niailhai hal nail ngaol: "Seiqlaiq khaoqsail eeq deede nail Aqbhu-ol, aqyu juq naoq nail ganl heeq nia lal dai, noeq heeq noeq moel nia nail neema khi, noeq heeq

noeq dov nia nail neema aqyu juq bhai bivq yaoq” dai, hal nail ngaol. ¹⁸ Ngal nuljuq nail haqbhoil geeqlaoq hal-u phaoq, Khali yaq juq ya nail jaiqbhoil bhai tavq nail seiqleiq khaoqsail khadai eeq nail bhai maqkhaiq, Miqyail nuljuq bhai khul nail ngel-i mail, noeqthunq nail pha q khalthai jia v nail bhai maqkhaiq, nuljuq nail neema lavqkhoel bhai noeq moel nia lal nail haqbhoil, ngal geeqlaoq hal nail ngaol. ¹⁹ Neema thaqtsaol nail tsaol-aq pevq nail ngadao nail lavqkhoel bhai ganl nl thailthaiq nail aivq nail bhaqaoq, khadai eeq nail ganl juq nuljuq heeq nia lal dai iqsanl, hal nail ngaol. Ngadao nail lavqkhoel bhai ganl nl nail bhaqaoq al neq, gaq kav deede e nail bhaqaoq pevq nail ngaol. ²⁰ Miqyail bhaqaoq al bhai juq khi, Khali bhai bhi doevq kovq lal nail ngaol. A bhai nee ngal-aq, Miqyail nqtavq kovtavq bhai aivq nail lavqmal phao bhi jaoldeel-a nail ngaol. ²¹ Miqyail nail lavqmal phao jaol nail Khali neq, uvthaiq nail juq nail kovtavq bhai maqkhaiq, bhaqaoq eeq nail juq nail kovtavq bhai maqkhaiq, gaq kav nail juq nail kovtavq bhai maqkhaiq, heeqphaq iqsanl nail kovtavq bhai maqkhaiq, aqmil khal mil-ai tha q nail iqsanl nail kovtavq bhai maqkhaiq, niil yeel nail lavqkhoel bhai maqkhaiq, yaqhao khe yeel nail lavqkhoel bhai maqkhaiq, eeq dee heel deede e nail ngaol. ²² Miqyail-i mail yaoq pha q yaoq-ao nee bhai Khali nail kov-uvq bhai bhi jaol bhi jia v-a nail ngaol. Al ovqtavq, Khali yaq munl nail haqbhoil aivq iqsanl nail kovtavq bhai uqhuq bhi jio vq-a nail ngaol. ²³ Khali yaq munl neq, Khali nail aqmaol ngaol. Aivq aqmaol al

nail lavqkhoel bhai teevq bhee jaol nail khe-ai, yaoq phaog yaoq-ao nee bhee lal dai iqsanl, aivq nl nail ngaol.

2

Khali nail lavqkhoel Miqyail ngadao bhai bhi doevq lavq-a nail ganl

¹ Nuljuq Miqyail nail daoq maq naldaiq mail oeqbal nail lavqkhoel bhai sil-u phao, Miqyail nuljuq bhai bhi doevq kovq lal-a nail ngaol. ² Jel lal-u phao, nuljuq niil yeel nail aol haqev nail haoqnao tsaothe-a nail ngaol. Aq-u phao, nqtavq khi miltsaq nail gaiqlaq bhai jaol nail juq bhai uvthaiq nail neivq Saqdaq nail haoqnao iqsanl, tsaothe-a nail ngaol. Aivq neq, Miqyail nail daoq maq naldaiq nail tsaol-aq juq nail neema lavqkhoel bhai ganl nl nail aqheel ngaol. ³ Jel lal-u phao, ngadao juq iqsanl Miqyail nail daoq maq naldaiq nail tsaol-aq al juq nail lavqkhoel bhai aol-a nail ngaol. Aq-u phao, ngadao juq aqsivq haqjoil nail neekhaol nl movq nail ngel-i mail, aqsivq haqjoil phao nl movq nail khe-ai maqkhaiq, neenoeq neelov nl movq hal movq nail khe-ai maqkhaiq, nl-a hal-a nail ngaol. Alheel ngel-i mail, ngadao juq iqsanl, yu khe-ai dul dai, Miqyail neema phail nail phaog bhai daq heeq phaog-a il tsaog nail tsaol-aq ngaol.

⁴⁻⁵ Thailhai ngaol-aog, gaoqhaq gaiq-a nia deede nail Miqyail neq, aivq nail goil nail gaiq-a nail phaog ngadao nail kovtavq bhai eeq deede nail ngel-i mail, ngadao oeqbal lavqkhoel bhai sil-ai thaog khi ngaol-aog, aivq ngadao bhai Khali

nee mail aqdoevq bhi doevq lal-a nail ngaol. Miqyail nail geeqlaoq eeljaol bhaqda nee nuljuq hevqkovq nail pha q ya-a nail ngaol. ⁶ Miqyail neq, ngadao bhai Yeiqsul Khali nee mail teevq gaq khe-ai bhi doevq kovq lal khi, aivq nee mail teevq gaq khe-ai, nqtavq kovtavq khe jaol duq lavqkhoel bhai bhi jaol lavq-a nail ngaol. ⁷ Khul khi mail dai ngal-aq neq, Miqyail nail aqmeeq pha ngadao bhai, Yeiqsul Khali nail lavqkhoel bhai bhi moel lavq khi, aivq nail geeqlaoq eeljaol khadai eeq nail ngel-ail dai, yaqhao khe aqyanq lavqkhoel bhai phaodaiq lavq nail dai khi, aivq alhai nl lavq-a nail ngaol. ⁸ Nuljuq neema thaqtsaol nail lavqkhoel Miqyail nail geeqlaoq eeljaol bhaqda nee, hevqkovq nail pha q ya-a nail ngaol. Yovqgavq bhai yovqgavq nl-a hal-a nail bhaqda nee ya-a nail maq ngel-ail. Miqyail-i mail bivq lavq-a nail kovpavq ngaol. ⁹ Nl nail hal nail bhaqda nee ya-a nail maq ngel-ail. Alheel ngel-i mail, tsaol-aq teevq gaq iqsanl neema eeq duq maq jlav-ail. ¹⁰ Khul khi mail dai ngal-aq neq, Miqyail ngadao bhai teivq-ai tha q nail ngaol. Ngadao aqmeeq pha q nl dai, aivq Yeiqsul Khali nail lavqkhoel-ai ngadao bhai teivq-ai tha q nail ngaol. Miqyail iqmoeq-u nee mail lainq-ai tha q nail khe-ai, ngadao aqmeeq al juq nl dai, bhi doevq bhi jaol lavq-a nail ngaol.

Khali nail lavqkhoel nee tsa q lai jil lai-a nail ganl

¹¹ Jel lal-u phao, nuljuq aqsivq haqjoil phao yu nail jeq-e jaq-a pevq nail bhai, tha q niolpeivq dei-eiq. Aq-u phao, bavkov uqjaq oev nail

yuldav tsaol-aq juq nuljuq bhai, bavkov uqjaq maq oev nail tsaol-aq dai, khul-a nail ngaol. Thailhai ngaol-aog, bavkov uqjaq oev-a nail al neq, aqsivq haqjoil phao oev-a nail teevq-eel ngaol. ¹² Nuljuq neq, aqyanq al yanq lavqkhoel, Khali nee mail teevq peivq-ail maq jil lai nia-ail. Ilsaqlaiqlal munl lavqkhoel bhai iqsanl, maq aol-ail. Geeqlaoq ya naol dai, ge-ai thaq nail daoqma saljial juq bhai iqsanl, maq tavq-ail. Nuljuq neq, miltsaq kovtavq bhai jaol-u phao, noeqthunq duq maq jiaiv nail nee ovqtavq, Miqyail maq bhao nail bhai iqsanl, thaq niolpeivq dei-eiq. ¹³ Jel lal-u phao, nuljuq eqyal bha jaol khi ngaol-aog, Yeiqsul Khali nail lavqkhoel-ai, aivq nail aqsivq bhaqda nee, Miqyail niil aq-il aqjail bhi jail lal-aog nail ngaol.

¹⁴ Khul khi mail dai ngal-aq neq, Khali bhaqda nee ngadao juq nail gaiqlaq bhai tsaq lai jil lai-a nail ngaol. Aivq neq, ngadao tsaoljeq-e nvq jeq-e bhai teevq jeq-e taivq-ail bhi pevq lal khi, tsaol jeq-e al nvq jeq-e nail gaiqlaq bhai thao pav-ai thaq nail ilphail khe-ai dul nail neejiaiv jiaiv nail pha q bhai peiv ha-a nail ngaol. ¹⁵ Aivq nail aqmaol laol bhiq-a nail lavqkhoel nee, aoldaoq kovqdaoq nail aol juq khi bivq-ai thaq nail daoq al juq bhai, aivq phi ha-a nail ngaol. Aivq alhai nl-a nail neq, tsaol jeq-e nvq jeq-e pevq nail bhai aivq nail lavqkhoel nee tsaol jeq-e aqsivq teevq jeq-e taivq-ail bhi pevq lal khi, bhi tsaq bhi jil lai nail dai, nl lavq-a nail ngaol. ¹⁶ Yeiqsul lavqyavq kovtavq bhai sildan-a nail bhaqda nee, ngadao tsaol jeq-e nvq jeq-e bhai teevq jeq-e taivq-ail bhi pevq lal-a nail nee ovqtavq, Miqyail bhai tsaq

lai jil lai dai iqsanl, aivq nl lavq-a nail ngaol. Lavqyavq bhaqda nee, teevq gaq nee teevq gaq neejlav jlav nail pha q bhai bhi peivq ail-a nail ngaol. ¹⁷ Khali lee khi, e qyal bhai jaol nail nuljuq bhai maqkhaiq, aqjail bhai jaol nail nvjuq bhai maqkhaiq, neesal-ovq dei-eiq dai, Khali lavqkhiq tsail nail geeqlaoq daoq cavq lavq-a nail ngaol. ¹⁸ Aivq bhaqda nee ngadao tsaol jeq-e nvq jeq-e nvq jeq-e-ail, Aqhaqlal Miqyail teevq gaq teevq-eel nail lavqkhoel nee, Aqbhu Miqyail jaol nail bha lai nail gailkhaol daol lal-a nail ngaol.

¹⁹ Alheel ngel-i mail, nuljuq yaoq kha oq yaoq mil yaoq khe tsaol-aq maq ngel-ail. Daq-i iqsanl maq ngel-ail. Meeq nail haol nail tsaol-aq juq nee milkhaoq teevq kha oq bhai jaol khi, Miqyail nail ilkhaol lavqkhoel khe yaq juq ngaol. ²⁰ Ilkhaol al il bhai iqmoeq ilmoeq kaovq-ai tha q nail pha q neq, gaqkhoel juq khi Miqyail nail haqbhoil gedan nail juq ngaol. Miqyail nuljuq bhai al nail kovtavq bhai kaovq-ai tha q nail ngaol. Yeiqsul Khali neq, ilkhaol nail jioivqloiv bhai kaovq-ai tha q nail lovmav heeq ma ngaol. ²¹ Aivq nail lavqkhoel nee ilkhaol il lao lao-ail teevq pha q nee teevq pha q tsa q lai thailthaiq nail ngaol. Yeiqsul nail lavqkhoel mee q nail haol nail uqhuq tha oq nail ilkhaol il ma pevq lal dai, ilkhaol al il ee q lal thailthaiq nail ngaol. ²² Miqyail jaol nail ilkhaol pevq lal dai, aivq neq, Aqhaqlal Miqyail bhai juq juq-ail nuljuq bhai iqsanl ilkhaol al il nail lavqkhoel bhai kaovq bhoel thailthaiq nail ngaol.

Paolluv yu nail jeq-e nail haqbhoil ganl nl nail

¹ Ngal neq, Paolluv ngaol. Yeiqsul Khali nail ganl bhaqda nee ngal thaonq bhai aol thailthaiq nail ngaol. Ganl al neq, yu nail jeq-e jaq-a pevq nail nuljuq bhai lavqkhiq tsail nail geeqlaoq daoq cavq-a nail al ngaol.

² Nuljuq ya gaiq-a nail khe-ai, nuljuq bhai bhiq tsojao-ai nail haqbhoil, Miqyail aivq nail geeqlaoq eeljaol ngaq bhai bivq lavq-a nail ngaol.

³ Miqyail neq, aivq-i mail oil tsail-ai thaq nail pha, ngaq bhai phaodaiq lavq-a nail ngaol. Ganl niil ngal davqnil nil dai, gevq-ai thaq nail ngaol.

⁴ Nuljuq haoqgavq al keiv ge daiq-u phao, Khali bhai tavq nail oil tsail-ai thaq nail pha q bhai, ngal heeq nia-ail nial dai, nuljuq ya heeq kivq nail ngaol.

⁵ Oil tsail-ai thaq nail al pha q nail ganl, milnee uqnee khe tsaol-aq juq bhai maq bhi heeq nia khi ngaol-aq, aqyanq niil nail lavqkhoel Aqhaqlal Miqyail neq, Miqyail nail meeq nail haol nail gaqkhoel juq khi aivq nail haqbhoil gedan nail juq bhai, phaodaiq bhiq-a nail ngaol.

⁶ Oil tsail-ai thaq nail al neq, niailhai ngaol. Lavqkhiq tsail nail geeqlaoq daoq bhaqda nee yu nail jeq-e jaq-a Yeiqsul Khali nail lavqkhoel, Yuldav nail tsaol-aq nee jaiqbhoil ya khi, aqyu juq nee mail teevq maol taivq-ail pevq lal nail nee ovqtavq, jaq-ai thaq nail saljial bhai iqsanl teevq gaq khe-ai ya-a nail ngaol.

⁷ Miqyail nail geeqlaoq eeljaol ngaq bhai bivq lavq-a nail khe-ai, lavqkhiq tsail nail geeqlaoq daoq niil, yu bhai cavq bhiq-ail yaoq dai, aivq ngaq bhai khoel lavq-a nail ngaol. Aivq aivq nail bhaqaoq lavqkhoel bhai nl lavq-a nail ngel-i

mail, ngal aivq nail kovpavq niil ya-a nail ngaol. ⁸ Khali nail lavqkhoel bhai aol nail, mao dee bhee deedeede khi aqphoiq phoiq nail ganl juq, yu nail jeq-e jaq-a bhai cavq bhiq ail dai, Khali yaq iqsanl nail lavqkhoel khe, yu nee maqtsil theq nail gaq pevq nail ngaq bhai, Miqyail geeqlaoq eeljaol al bivq lavq-a nail ngaol. ⁹ Al ovqtavq, iqsanl bhai teivq-a nail Miqyail aivq nail neema lavqkhoel-ai, milnee uqnee nee oil tsail-ai thaq nail al pha, khalhai bhee lal thailthaiq nail ganl tsaol-aq iqsanl bhai bhaqlaoq kheq dai, phaodaiq bhiq dai, aivq ngaq bhai geeqlaoq eeljaol bivq lavq-a nail ngaol. ¹⁰ Khul khi mail oil tsail-ai thaq nail dai ge haq neq, Miqyail neenoq neekha khadai ee q khadai heel nail ganl, Khali yaq munl bhaqda nee nqtavq khi mail miltsaq nail gaiqlaq bhai uvthaiq nail juq khi bhaqaoq ee q nail juq bhai niil aq-il bhi heeq nia nail dai khi, milnee uqnee nee oil tsail-ai thaq nail ngaol. ¹¹ Miltsaq maq teivq-u nee mail, aivq-i mail noeqceiv-ai thaq nail khe-ai, ngadao nail Heeqphaq Yeiqsul Khali nail lavqkhoel niil aq-il bhee lal dai, aivq alhai nl-a nail ngaol. ¹² Ngadao juq Yeiqsul nail lavqkhoel bhai jaol khi, aivq bhai neema thaqtsaol nail ngel-i mail, geesil nail neema maq aol dai, Miqyail nail sivtavq bhai aol lai kivq nail ngaol. ¹³ Alheel ngel-i mail, ngal nuljuq nail haqbhoil haq dee aq deedeede nail juq ya daq thailthaiq nail bhaqda nee, neema thaq cov dei-eiq dai, ngal nuljuq bhai hal nail ngaol. Ngal ya daq thailthaiq nail niil neq, nuljuq nail haqbhoil seiqleiq khaoqsail ngaol.

Aqyu juq Yeiqsul nail goil nail gaiq-a nail pha q bhai heeq nia lal dai, Paolluv geeqlaoq hal-a nail ganl

¹⁴ Ganl niil bhaqda nee, Aqbhu Miqyail nail sivtavq bhai ngal peevqceevq kovdoi q doi q khi geeqlaoq hal nail ngaol. ¹⁵ Aivq neq, nqtavq kovtavq bhai jaol nail nqtavq gaqkhoel juq bhai maqkhaiq, miltsaq kovtavq bhai jaol nail tsaol jeq-e iqsanl bhai maqkhaiq, maldil Aqbhu gaq ngaol. ¹⁶ Ngal niailhai geeqlaoq hal nail ngaol. Miqyail nail seiqleiq khaoqsail eeq dee mao deede nee nail khe-ai, aivq nail Aqhaqlal Miqyail bhaqda nee nuljuq nail neema lavqkhoel bhai bhaqaoq khi gaq teevq bhee aol lal dai, ngal geeqlaoq hal nail ngaol. ¹⁷⁻¹⁸ Al ovqtavq, nuljuq neema thaqtsaol nail ngel-i mail, Khali nuljuq nail neema lavqkhoel bhai jaol ivq lal dai, geeqlaoq hal nail ngaol. Nuljuq goil nail gaiq-a nail lavqkhoel nee, daoqtsail kha-ail khi daoqthaq ivq nail ngel-i mail, Khali yaq iqsanl nee mail Khali nail goil nail gaiq-a nail al, khadai eeq khadai heel, khadai moe khi, khadai navq nail bhai heeq nia lal dai iqsanl, ngal geeqlaoq hal nail ngaol. ¹⁹ Tsaol-aq yaq-i mail teevq bhee teevq lovq maq heeq kivq-a nail, Khali nail goil nail gaiq-a nail pha q bhai nuljuq heeq nia lal dai iqsanl, ngal geeqlaoq hal nail ngaol. Aivq nail goil nail gaiq-a nail al pha q bhai heeq nia lal- u phao, Miqyail nail lavqkhoel bhai bhee nail yaoq pha q yaoq-ao nee nuljuq nail lavqkhoel bhai bhee lal nail ngaol.

²⁰ Miqyail nail bhaqaoq ngadao nail lavqkhoel bhai nl nail hal nail ngel-i mail, ngadao hal nail

khi noeq nail dul nail nee maqtsil, aivq maodai nl lavq hal lavq nail ngaol. ²¹ Khali yaq munl nail lavqkhoel bhai maqkhaiq, Yeiqsul Khali nail lavqkhoel bhai maqkhaiq, nqmaq maqluv halyeel Miqyail bhai tsiqeeq bhel.

4

Aqhaqlal Miqyail bhaqda nee neema teevq heeq taivq-ail tavq nail ganl

¹ Yeiqsul bhaqda nee thaonq bhai aol thailthaiq nail ngal, nuljuq bhai niailhai hal nail ngaol. Miqyail nuljuq bhai khul khi aqdoevq bhi doevq-a nail ngaol. A bhai geel-nvq dai, aqdoevq doevq yaoq. ² Khaq mao iqsanl yovqgavq bhai yovqgavq thaqttheq khi, neema neenuq neebeiv aol yaoq. Al ovqtavq, neema heelma ma dai thaq khi, goil nail gaiq-a nail lavqkhoel nee teevq gaq nee teevq gaq ol yaoq. ³ Tsaq lai jil lai nail pha-q-i mail nuljuq bhai leel jaoq-ai thaq nail lavqkhoel, Aqhaqlal Miqyail bhaqda nee khaq mao iqsanl neema teevq heeq taivq-ail tavq kivq lal dai, laijai deede yaoq. ⁴ Miqyail nuljuq bhai khul-u phao, nuljuq nail haqbhoil noeqthunq duq teevq pha-q taivq-ail bivq lavq-a nail khe-ai, nuljuq aqmaol teevq maol taivq-ail bhao khi, Aqhaqlal Miqyail teevq gaq taivq-ail nuljuq nail lavqkhoel bhai jaol nail ngaol.

⁵ Heeqphaq teevq gaq taivq-ail jaol khi, neema thaqtsaol nail teevq pha-q taivq-ail, ulcuvq saol nail iqsanl teevq pha-q jiav-ail teevq-eel ngaol. ⁶ Ngadao juq iqsanl nail Aqbhu Miqyail teevq gaq teevq-eel ngaol. Aivq neq, iqsanl nail kovtavq

bhai jaol khi iqsanl nail kovtavq bhai ganl nl nail khi, iqsanl nail lavqkhoel bhai jaol nail ngaol.

⁷ Khali aivq-i mail ngadao bhai kovpavq khal bivq lavq-a nail khe-ai, ngadao teevq gaq nee teevq gaq geeqlaoq al ya nail ngaol. ⁸ Alheel ngel-i mail, Jalliq lavqkhoel bhai niailhai gevq-ai thaq nail ngaol:

“Aivq daqmoe bhai
dav lai-u phao,
aivq bhai neejlav
jav nail juq bhai
phee dal laivq-a nail ngaol.
A bhai nee ngal-aq,
aivq tsaol-aq yaq bhai
kovpavq bivq nail ngaol” dai,
gevq-ai thaq nail ngaol.

⁹ Aivq dav lai-a nail dai ge nail al neq, iqmoeq-u phao miltsaq daoqthaoq bhai yavq kha ail-a nail bhai ge nail, maq ngel-ail laiq. ¹⁰ Yavq kha ail-a nail al gaq, yaoq pha q yaoq-ao nee bhee lal dai, nqtavq kovtavq bhai iqsanl dav lai-a nail al gaq ngaol. ¹¹ Aivq-i mail bivq lavq-a nail kovpavq al juq neq, niil juq ngaol. Tsaol-aq teevq pav ganav juq bhai gaqkhoel bhi jiovq-a nail ngaol. Teevq pav ganav juq bhai Miqyail nail haqbhoil gedan nail juq bhi jiovq-a nail ngaol. Teevq pav ganav juq bhai, lavqkhiq tsail nail geeqlaoq daoq cavq nail juq bhi jiovq-a nail ngaol. Teevq pav ganav juq bhai Khali yaq munl bhai heldaiq phail khi cavq bhiq cov bhiq nail juq bhi jiovq-a nail ngaol. ¹² Khali nail aqmaol ee q lal heel lal nia dai, Miqyail nail haqbhoil ganl bhi nl nail dai khi, aivq nail tsaol-aq iqsanl bhai

kovpavq al bivq-a nail ngaol. ¹³ Alhai nl haq neq, ngadao juq iqsanl mail, neema thaqtsoal nail lavqkhoel nee maqkhaiq, Miqyail nail Yagyov bhai heeq nia nail lavqkhoel bhai maqkhaiq, neema teevq heeq taivq-ail tavq nia lal nail ngaol. Al ovqtavq, ngadao iqsanl Khali bhee nail khe-ai bhee lal khi, yovkav eeq lal nail ngaol.

¹⁴ Yovkav eeq lal haq neq, ngadao yaq maq ngel nail ngel-i mail, jalmul mul nail tsaol-aq juq, neenoeq neekha yuq khi goiqbhaoq bhaoq bhaoq-ail mee nia pha qavq lal-u phao, lilmoe-i mail bho ha nail khe-ai, ngadao bhai maq bho pov maq bho lav nia-ail. ¹⁵ Al ovqtavq, ngadao goil nail gaiq-a nail lavqkhoel nee tsaq nail daoq taivq-ail ge khi, ngadao nail uqhuq pevq nail Khali nail lavqkhoel bhai yaoq pha qavq yaoq-ao nee, ya bhiq eeq ya bhiq heel lal nail ngaol. ¹⁶ Aivq bhaqda nee, aqmaol neq, uqhuq bhai covq cavq lai khi, aqmaol maol lao-ail eeq lal khi, goil nail gaiq-a nail lavqkhoel bhai eeq lal thailthaiq nail ngaol. Aqmaol al neq, khil ceevq lavq ceevq bhaqda nee, teevq khaoq nee teevq khaoq covq cavq khi, alsail yaoq sail yaoq-ao nee yovqgavq nail ganl yovqgavq nl nail ngel-i mail, aqmaol maol lao-ail eeq lal nail ngaol.

Khali nail lavqkhoel nee aqsivq doevq phal lal-a nail ganl

¹⁷ Alheel ngel-i mail, Yeiqsul nail lavqkhoel nee ngal nuljuq bhai niailhai aqduq aqtsil tsil dai, ge lavq bhel. Laolkivq yaq aqdoevq doevq nail khe-ai, nuljuq tha q doevq. Aqyu juq nail neenoeq neq, khul teevq pha q iqsanl ganl maq tsoiq-ail.

¹⁸ Agyu juq nail neema neq, navtsee deel ngaol. Agyu juq khul teevq phaḡ iqsanl maḡ heeq nia nail nee ovqtavḡ, neema aḡḡaol ngel-i mail, Miḡyail-i mail bivḡ-a nail aḡdoevḡ doevḡ nail phaḡ bhai teevḡ peivḡ-ail maḡ tavḡ-ail. ¹⁹ Agyu juq khul teevḡ phaḡ bhai iqsanl haḡsil nail maḡ bhaoḡ dai, aḡjiivḡ aḡcavḡ khaḡmiḡ sev nail phaḡ nl nail haḡbhoil aḡmaol av bhivḡ ḡaḡ khi, aḡjiivḡ aḡcavḡ phaḡ iqsanl bhai, neekhaol teevḡ sil nl nail ngaol.

²⁰ Thailhai ngaol-aḡ, nuljuḡ Khali bhai saol oil-a nail neq, alhai nl nail haḡbhoil maḡ ngel-ail.

²¹ Nuljuḡ Yeiqsul nail ḡanl ya ḡaiḡ-a nail ngel haḡ neq, aivḡ nail lavḡkhoel maldil tsaḡ nail phaḡ aol nail bhai, ya saol-a nail ngaol. ²² Nuljuḡ-i mail ya saol-a nail al neq, neema aḡlil loev ha-ail ceevḡ yaoḡ dai, ya saol-a nail ngaol. Neema aḡlil al neq, jel lal-u phao, nuljuḡ-i mail nl nail hal nail aol juḡ bhai tavḡ khi, bhi laiḡ-ail nia nail jalmul mul nail juḡ bhaḡda nee, luḡ-ail seil-ail thailthaiḡ nail ngaol. ²³ Nuljuḡ nail neema aḡsivḡ bhi phal lal yaoḡ. ²⁴ Maldil tsaḡ nail phaḡ pevḡ nail, tsaḡ nail daol nail khi mail meeq nail haol nail lavḡkhoel, Miḡyail khe-ai dul lai dai, teivḡ-ai thaḡ nail aḡdoevḡ doevḡ nail aḡsivḡ phaḡ doi yaoḡ.

²⁵ Alheel ngel-i mail, ḡoiḡbhaoḡ bhaoḡ nail phaḡ bhai khaonḡ ha-ail ceevḡ khi, teevḡ ḡaḡ nee teevḡ ḡaḡ maldil tsaḡ nail daḡ taivḡ-ail ḡe tsaḡ yaoḡ. Khul khi mail dai ngal-aḡ, ngadao neq, aḡmaol teevḡ maol bhai taivḡ-ail covḡ nail alsail juḡ ngaol. ²⁶ Nuljuḡ neema phail khi ngaol-aḡ, oeḡbal thaḡ nl. Nlma maḡ ḡa bhoel ail-u nee mail

neema phail nail phaḡ bhi sivḡ ail yaoḡ. ²⁷ Neivḡ heeqphaḡ nail haḡbhoil jaol duḡ thaḡ bhi ya. ²⁸ Khoiqbhaoḡ bhaoḡ nail tsaol-aḡ juḡ neḡ, maḡ bhaoḡ daiḡ khaonḡ khi, yovḡḡavḡ doevḡ nia jaol nia nail nee ovḡtavḡ, haḡ yaḡ aoḡ yaḡ juḡ bhai tsaojao-ai kivḡ dai, aḡsee aḡdaol daol dai, ganl nl jaḡ keivḡ daol yaoḡ.

²⁹ Nuljuḡ nail moeqthaoḡ lavḡkhoel nee maḡ meeḡ nail daoḡ teevḡ daoḡ-ail thaḡ bhi dov lal. Ya gaiḡ nail tsaol-aḡ nail haḡbhoil ganl tsoiq dai, yu loḡ nail bhai tsaḡ lai nail daoḡ taivḡ-ail ge khi, yu bhai bhi eeḡ bhi heel lal nail daoḡ aḡmeeḡ taivḡ-ail ge yaoḡ. ³⁰ Miḡyail nail Mee-ḡnail Haolnail Aḡhaḡlal bhai thaḡ bhi noeḡhaḡ. Hevḡkovḡ nail aḡn bhai kev dai, Miḡyail nuljuḡ bhai Aḡhaḡlal Miḡyail nail lavḡkhoel nee aḡtsaḡ cov-ai thaḡ nail ngaol. ³¹ Yu bhai neema nal nail, yu bhai neema bhao nail, yu bhai neema phail nail, yu nee mail iqḡdaiḡ iqḡtsai dov nail, yu bhai khal ge movḡ-ail ge nail, niil juḡ iqḡsanl bhai khaonḡ ha yaoḡ. Yu bhai khoeḡ lai dai nl movḡ nail yaoḡ phaḡ yaoḡ-ao nee iqḡsanl, khaonḡ ha-ail ceevḡ yaoḡ. ³² Nuljuḡ teevḡ ḡaḡ nail gaiḡlaḡ teevḡ ḡaḡ aḡmeeḡ phaḡ nl khi, teevḡ ḡaḡ nail gaiḡlaḡ teevḡ ḡaḡ ḡaoḡhaḡ gaiḡ-a nail neema aol yaoḡ. Miḡyail Khali bhai juḡ khi nuljuḡ nail oeḡbal bhai phaiḡ-a nail khe-ai, nuljuḡ iqḡsanl teevḡ ḡaḡ nee teevḡ ḡaḡ oeḡbal phaiḡ bhiḡ yaoḡ.

5

Aḡbhaḡ nail yaḡ khe-ai aḡdoevḡ doevḡ yaoḡ

¹ Nuljuq neq, Miqyail gaiq-a nail aivq nail yaq pevq nail ngel-i mail, aivq khe-ai dul lal dai, aqdoevq doevq yaoq. ² Khali ngadao juq bhai gaiq-a nail khe-ai, goil nail gaiq-a nail lavqkhoel aqdoevq doevq yaoq. Khali ngadao nail haqbhoil laol bhiq nail dai khi, aivq nail aqmaol Miqyail bhai av bhiq-a nail ngaol. Laol bhiq-a nail al neq, Miqyail neekhaol sil nail huqbhiq nil nail phaqa ngaol.

³ Nuljuq neq, Miqyail nail tsaol-aq pevq nail ngel-i mail, khaqmiq sev nail, aqjiivq aqcavq yaoq phaqa yaoq-ao nee nl nail, neekhaol jiaa nail, niil heel nail ganl juq bhai maq ya nl-ail. Nuljuq nail gaiqlaq bhai al juq ge-ail taivq-aail ge khi ngaol-aq, maq tsaq-aail. ⁴ Aqjiivq aqcavq cavq nail daoq, ganl maq tsoiq nail daoq khi mail, ceivqleivq kha nail daoq, daoq niil juq bhai nuljuq teevq peivq-aail thaqa ge thaqa thail. Miqyail bhai tsiqeeq nail daoq taivq-aail ge yaoq thail yaoq. ⁵ Khul khi mail dai ngal-aq neq, khaqmiq sev nail tsaol-aq, aqjiivq aqcavq phaqa nl nail tsaol-aq, neekhaol jiaa nail tsaol-aq khul gaqa maqkhaiq, Khali khi mail Miqyail Milkhaoq lavqkhoel bhai maq ya aol lai-aail dai, nuljuq heeq kivq yaoq. Neekhaol jiaa nail tsaol-aq, thaopphaoq aqma maolkhoel bhai uqhuq thaqa nail tsaol-aq khe-ai dul nail ngaol.

⁶ Tsaol-aq teevq gaqa-aail ganl maq tsoiq nail daoq ge ge-aail, nuljuq bhai jalmul maq ya mul ya dai, yaolphaol yaoq. Al juq bhaqda nee Miqyail neema phail nail phaqa, aivq nail daoq maq naldaiq nail tsaol-aq nail kovtavq bhai kev

lee nail ngaol. ⁷ Alheel ngel-i mail, aqyu juq bhai gaoqceiv ceiv yaoq.

⁸ Jel lal-u phao, nuljuq iqsanl, aqnav nail lavqkhoel bhai doevq daiq-a nail tsaol-aq juq ngaol. Thailhai ngaol-aq, niil aq-il neq, Yeiqsul bhaqda nee aqbhaq nail lavqkhoel bhai jaol lal-aq nail ngaol. Alheel ngel-i mail aqbhaq nail yaq khe-ai aqdoevq doevq yaoq. ⁹ Aqbhaq al neq, maldil tsaq nail pha, aqmeeq pha khi mail tsaq nail daol nail pha, bhi dov lal nail ngaol. ¹⁰ Nuljuq Miqyail neema tsaq nail pha bhai halpov moel kivq dai, laijai yaoq. ¹¹ Aqnav pha bhai tavq nail ganl maq tsoiq nail nl nail hal nail juq bhai teevq peivq-ail thaq nl thaq hal. Ganl al juq khadai haqev nail ngel-ail dai, bhi dov lal yaoq. ¹² Miqyail nail daoq maq naldaiq nail juq-i mail, bhallal bhai nl-a nail ganl juq bhai, ngadao ge-ail taivq-ail ge khi ngaol-aq, haqsil duq jiav nail ngaol. ¹³ Khul pha ngaol-aq, aqbhaq pha nail lavqkhoel bhai, oil dov gil lavq-u phao, aqyu juq khalheel nail tsaol-aq pevq nail bhai, bhaqlaoq kheq dai, moel duq lal nail ngaol. ¹⁴ Alheel ngel-i mail:

“Iqthaiq kov-ai thaq nail
tsaol-aq juq-ol,
noeq lal yaoq.
Sil nail pha nee
gaoq doevq kovq lal yaoq.
Khali naoq bhai
aqbhaq pha lavq naol” dai,
ge-ai thaq nail ngaol.*

* **5:14** 5.14 Aq-u khe tsaol-aq nail daoqsel gul nail pha pevq nail ngaol.

15 Alheel ngel-i mail, nuljuq aqdoevq doevq nail aqmeeq-ai yaolphaol yaoq. Neenoeq neekha maq aol nail tsaol-aq khe-ai thaq doevq. Neenoeq neekha aol nail tsaol-aq khe-ai doevq yaoq. 16 Niil yeel neq, haqev nail yeel ngel-i mail, yanq khal ya-u phao teevq peivq-ail maq bhi sunq-ail dai, nl thailthaiq yaoq. 17 Neenoeq neekha maq aol nail tsaol-aq thaq bhi pevq. Miqyail neema khalhai tsaq nail ngel-ail dai, heeq nia nail tsaol-aq pevq yaoq. 18 Jilpheedq thaq daol bov. Al neq, nuljuq bhai bhi cov-ail nail teevq-eel ngaol. Thailhai ngaol-aq, nuljuq nail lavqkhoel bhai Meeqnail Haolnail Aqhaqlal teevq bhee bhi jaol yaoq. 19 Miqyail bhai tsiqeeq nail daoq yaoq pha q yaoq-ao nee, daoqsel gul khi, teevq gaq nee teevq gaq tsiq eeq yaoq. Nuljuq nail neema lavqkhoel bhai kev dai, gul gul-ail Miqyail bhai tsiqeeq yaoq. 20 Ngadao nail Heeqphaq Yeiqsul Khali nail aqmil bhai juq juq-ail, yaoq pha q yaoq-ao nee nail haqbhoil, Aqbhu Miqyail bhai khaq mao iqsanl tsiqeeq yaoq.

Khaqma khi mail yovjil aqdoevq khalhai ya doevq nail ganl

21 Khali bhai ev nail lavqkhoel, teevq gaq nail kov-uvq teevq gaq aqmeeq-ail jaol yaoq.

22 Khaqma juq-ol, Yeiqsul nail kov-uvq bhai jaol nail khe-ai, yovqgavq nail yovjil nail kov-uvq bhai jaol yaoq. 23 Khul khi mail dai ngal-aq neq, Khali neq, Khali yaq munl nail uqhuq pevq nail khe-ai, yovjil iqsanl yovqgavq nail khaqma nail uqhuq ngaol. Khali neq, aivq nail aqmaol pevq nail Khali yaq munl bhai Hevqkovq nail gaq

pevq nail ngaol. ²⁴ Alheel ngel-i mail, Khali yaq munl juq Khali nail kov-uvq bhai jaol nail khe-ai, khaqma juq iqsanl, yovqgavq nail yovjil nail kov-uvq bhai ya jaol nail ngaol.

²⁵ Yovjil juq-ol, Khali yaq munl bhai Khali gaiq-a nail ngel-i mail, aqmaol laol bhiq-a nail khe-ai, nuljuq iqsanl yovqgavq nail khaqma bhai gaiq-a yaoq. ²⁶ Aivq nail aqmaol laol bhiq-a nail al neq, Khali yaq nail munl meeq lal haol lal nail haqbhoil ngaol. Khali neq, ulcuvq khi geeqlaoq daoq-i mail, aqyu juq bhai tsiq haol-a nail ngaol. ²⁷ Khul khi mail tsiq haol-a nail dai ngal-aq, malbavq malyal maq bhao-ail ge duq maq jiav nail nee ovqtavq, meeq nail haol nail, oeqbal thaq duq maq jiav nail Khali yaq munl pevq lal khi, seiqlaiq khaoqsail teevq bhee aol nail lavqkhoel, munl al munl aivq nail sivtavq bhai jaol nia dai, Yeiqsul tsiq haol-a nail ngaol. ²⁸ Alhai dul dai, yovjil juq iqsanl yovqgavq nail aqmaol bhai gaiq-a nail khe-ai, yovqgavq nail khaqma bhai ya gaiq-a naol. Yovqgavq nail khaqma bhai gaiq-a nail tsaol-aq neq, yovqgavq nail aqmaol bhai gaiq-a nail ngaol. ²⁹ Tsaol-aq teevq gaq iqsanl, yovqgavq nail aqmaol bhai yovqgavq maq bhe-ail. Yovqgavq nail aqmaol bhai yovqgavq bhi jaq bhi daol khi heldaiq phail nail ngaol. Khali iqsanl alhai dul dai, Khali yaq munl bhai heldaiq phail nail ngaol. ³⁰ Ngadao neq, Khali nail aqmaol bhai covq nail alsail juq pevq nail ngaol.

³¹ “Alheel ngel-i mail, yovjil juq neq, yovqgavq nail aqbhu aqma nee pavq-ail khi, yovqgavq nail

khaqma nee ya doevq tavq nail lavqkhoel, nvq gaq teevq gaq taivq-ail pevq lal nail ngaol” dai,
 Jalliq lavqkhoel bhai gevq-ai thaq nail ngaol.

³² Ganl niil neq, daoqceevq navq deedee nail ngaol. Ngal niailhai ge nail neq, Khali khi aivq nail munt nail ganl ge nail ngaol. ³³ Alheel ngel-i mail, yovjil juq-ol, yovqgavq nail aqmaol bhai gaiq-a nail khe-ai, yovqgavq nail khaqma bhai gaiq-a yaoq. Khaqma juq iqsanl, yovqgavq nail yovjil bhai ev yaoq.

6

Aqbhu aqma khi yaq juq doevq tavq nail ganl

¹ Yaq juq-ol, Miqyail neema tsaq nail khe-ai, yovqgavq nail aqbhu aqma nail daoq naldaiq yaoq. Nuljuq alhai nl nail tsaq nail ngaol.

² “Naoq nail aqbhu aqma bhai ev yaoq” dai, ge nail aoldaoq kovqdaoq niil daoq bhai naldaiq nail tsaol-aq juq bhai, Miqyail nail geeqlaoq bivq nail haqbhoil saljial jaq-ai thaq nail Aoldaoq Kovqdaoq iqmoeq khe daoq ngaol. ³ “Alhai ev haq neq, naol yaoq pha q yaoq-ao nee nail lavqkhoel bhai bhao lee ya lee khi, miltsaq kovtavq bhai aqdoevq doevq-u phao, yeel bhao yeel ya nail ngaol” dai, ge-ai thaq nail ngaol.

⁴ Aqbhu juq-ol, naoq nail yaq juq neema phail lal dai, tha q nl bhiq. Miqyail neema tsaq nail khe-ai, cavq bhiq cov bhiq khi, tsu ee q bhiq yaoq.

Yaqkav juq khi ilheel juq doevq tavq nail ganl

⁵ Yaqkav juq-ol, Khali nail daoq naldaiq nail khe-ai, miltsaq kovtavq bhai jaol nail yovqgavq nail ilheel nail daoq bhai neema daolcoev dai,

geesil khi ev nail lavqkhoel nee naldaiq yaoq. ⁶ Ilheel ya moel dai taivq-ail nl hal khi, tsaol-aq neekhaol sil dai taivq-ail nl nail hal nail pha q tha q bhi pevq. Khali nail yaqkav pevq nail ngel-i mail neema kev nail lavqkhoel nee Miqyail neema tsa q dai nl yaoq hal yaoq. ⁷ Nuljuq yaqkav jio vq khi, ya nl thailthai q nail ganl juq bhai, tsaol-aq ya q nail ganl nl bhi q nail khe-ai ma q ngel nail, Miqyail nail ganl nl bhi q nail khe-ai lavqkhi q tsail tav dai, nl bhi q yaoq. ⁸ Ya qkav ma qkhai q, ya qkav ma q ngel nail juq ma qkhai q, yovqgavq-i mail aqmeeq pha q nl-ai tha q nail khe-ai, Yeiqsul kovpavq bivq lavq naol dai, heeq kivq duq yaoq.

⁹ Ilheel juq-ol, alhai dul dai, nuljuq iqsanl ya qkav juq nail haqbhoil aqmeeq pha q nl bhi q yaoq. Aqyu juq bhai geesil lal heeq pha q-ail tha q nl bhi q. Nuljuq ma qkhai q, nuljuq nail ya qkav juq ma qkhai q, iqsanl mail teevq ga q khe-ai, nqtavq kovtavq khe jaol nail al ga q nail ya qkav pevq nail ngaol dai, heeq kivq yaoq. Aivq neq, yaoq ga q yaoq-ao nee bhai maivphaoq ee q nail nil nail ma q tsel pav-ail.

Miqyail nail genl dev nail khi n kha-ao

¹⁰ Haoqnao naosa q khe dao q neq, niail-hai ngaol. Heeqpha q Yeiqsul nail lavqkhoel nee ma qkhai q, aivq nail ga q kav deede e nail bha qao q lavqkhoel nee ma qkhai q, ga q kav lal yaoq. ¹¹ Neivq heeqpha q jalmul mul lal nail pha q bhai nuljuq ga q lai kivq dai, Miqyail-i mail bivq lavq-a nail khi n kha-ao iqsanl mail doi yaoq. ¹² Khul khi mail dai ngal-aq neq, ngadao

neq, tsaol-aq yaq bhai genl dev nail maq ngel-ail. Maq moel kivq nail, uvthaiq nail juq nee maqkhaiq, bhaqaoq eeq nail juq nee maqkhaiq, niil yeel nail lavqkhoel aqnav-i mail uvthaiq nail juq bhai maqkhaiq, nqtavq miltsaq nail gaiqlaq bhai jaol nail neivq juq bhai maqkhaiq, genl dev nail ngaol. ¹³ Alheel ngel-i mail, haqev nail aqn aqyanq kev lee-u phao, nuljuq jaol ivq kivq khi, iqsanl mail nl gil khi ivqdao dai thulphaol kivq dai, Miqyail-i mail bivq lavq-a nail khen kha-ao iqsanl mail doi-nq thaq yaoq. ¹⁴ Maldil tsaq nail phaqq jiovpavq pavq nail khe-ai pavq khi, tsaq nail daol nail phaqq doeqdaq duq khe-ai doi yaoq. ¹⁵ Neesal-ovq nail lavqkhiq tsail nail geeqlaoq daoq bhai, saiqnaov tsaq nail khe-ai tsaq-nq khi jaol yaoq. ¹⁶ Al ovqtavq, neivq Saqdaq-i mail bev-aivq lavq nail miqjaq tovq nail heeqnav maqtsoe bhai lav miv kivq dai, doeqdaq duq aqlavq bhai khaq mao iqsanl nieivq thaiq-ai thaqq nail khe-ai, neema thaqtsoal nail phaqq bhai khaq mao iqsanl nieivq thaiq-ai thaqq yaoq. ¹⁷ Hevqkovq nail phaqq pevq nail hail nail uqtsaoq tsaq khi, Aqhaqlal Miqyail-i mail bivq lavq-a nail thaoma pevq nail Miqyail nail daoq bhai tuv thaiq-ai thaqq yaoq.

¹⁸ Al juq iqsanl, Miqyail tsaqjao-ai lavq dai, geeqlaoq hal nail lavqkhoel nee doi yaoq. Aqhaqlal Miqyail nail lavqkhoel khaq mao iqsanl geeqlaoq hal yaoq. Al ovqtavq, gaq maq bhaq mail aqgeel geel dai jaol khi, geeqlaoq hal yaoq. Miqyail nail tsaol-aq juq nail haqbhoil khaq mao iqsanl, geeqlaoq hal yaoq.

¹⁹ Ngal geesil nail neema maq aol dai, lavqkhiq

tsail nail geeqlaoq daoq bhai tavq lai nail oil-uvq-ai thaq nail phaḡ, bhaḡlaoq kheḡ dai cavq bhiḡ kivq dai, ngaḡ nail haḡbhoil iqsanl geeqlaoq hal tsao yaoḡ. ²⁰ Ngal geeqlaoq daoq al daoq nail haḡbhoil jiḡdan pevq nail ngel-i mail, thaonḡ bhai aol thailthaiḡ nail ngaol. Ngal geeqlaoq daoq al daoq cavq bhiḡ heeḡ phaḡ-ail tsaḡ nail khe-ai, geesil nail neema maḡ aol dai, cavq bhiḡ kivq dai iqsanl, ngaḡ nail haḡbhoil geeqlaoq hal tsao yaoḡ.

Haoḡnao naosaḡ khe daoḡ

²¹ Ngal khalhai nl thail hal thailthaiḡ nail ganl, nuljuḡ ya heeḡ kivq dai, ngal gaiḡ-a nail jaḡbheḡ Duljil, nuljuḡ jaol nail bha lal kev-u phao, yaoḡ phaḡ yaoḡ-ao nee ge lavq naol. Aivq neḡ, Miḡyail nail ganl nl nail lavḡkhoel-ai, saljial ivq nail teevq ḡaḡ ngaol. ²² Nvjuḡ khalhai pevq nail bhai nuljuḡ ya heeḡ nia dai maḡkhaiḡ, aivq nuljuḡ nail neema bhai ḡaḡ bhi kav lal dai maḡkhaiḡ, ngal aivq bhai nuljuḡ jaol nail bha bhi lee naol.

²³ Aqivq jaḡbheḡ Khali yaḡ juḡ nail kovtavq bhai neesal-ovq nail phaḡ jiaḡ dei-eiḡ. Al ovq-tavq, Aḡbhu Miḡyail khi mail Heeḡphaḡ Yeiqsul Khali-i mail bivq lavq-a nail ḡoil nail gaiḡ-a nail phaḡ khi mail neema thaḡtsaol nail phaḡ iqsanl jiaḡ dei-eiḡ. ²⁴ Ngadao nail Heeḡphaḡ Yeiqsul Khali bhai khaḡ mao iqsanl, maḡ peivq maḡ boev-ail dai, gaiḡ-a nail tsaol-aḡ iqsanl nail kovtavq bhai geeqlaoq eeljaol jiaḡ dei-eiḡ.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5